

Devoziun dil matg per l'oraziun persunala

Maria che sliglia nos nuvs



Preparaziun per la devoziun a casa

Envidar ina candeila, preparar ina liunga corda

Avertura

Enten num dil Bab e dil Fegl e dil Spert sogn. Amen.

Gloria seigi al Bab ed al Fegl ed al Spert sogn.

Sco igl ei stau ell'entschatta, aschia uss ed adina ed en perpeten. Amen

Canzun – Alleluja 501.1

Tgi che vul buca cantar las canzuns sa era sulettamein leger e meditar ils plaids.

1. Bia - la sco il su - legl eis de mi - rar;
por - tas sin bratsch il Fegl, nies Se - gner car.
Gi - da tiu pie - vel cun cor - ge - ne - rus. Vol - va
l'e - glia - da, Ma - ri - a tier nus.

2. Steilas en clar rudi ein sur tiu tgau; / Dieus ha cun quei
tschupi tei beinornau. / Gida...

3. Gloria tei circumdat en tschiel stelliu; / gaudas beadadad
spel Fegl de Diu. / Gida...

Introducziun

Maria vegn descreta en biars maletgs – sco sora e mumma, sco steila dalla mar, sco rosa, sco dunna dil bien cussegl ed aunc bia dapli. In maletg special per Nossadunna ei quel da Maria che sligia nos nuvs. Tenor quei patratg vegn ella denter auter presentada sil maletg dad in altar ad Augsburg (mira cuviarta).

Tut quellas ovras muossan Maria el miez, circumdada da dus aunghels. Maria tegn enta maun in liung pindel cun plirs nuvs. En tutta ruasseivladad e cun bia

pazienzia ei ella vidlunder da sligar quels nuvs. Igl aunghel dad ina vart tegn la part dil pindel che cuntegn aunc il viriveri. Igl aunghel da l'autra vart ha enta maun il pindel senza nuvs. Enqual maletg presenta era Jesus che sesa sin Maria contemplond e tenend ils nuvs.

Quei maletg sa evidar nus, da seschar accumpignar da Maria tochen tier Jesus, el che enconuscha ils nuvs da nossa veta.

Oraziun

Diu vivent

Jeu sun cheu cun tut quei che fuorma mia veta. Cun il legreivel e lev, denton era cun quei ch' ei savens nunsligiau, embrugliont, quei che tegn mei a ferm ed ei grev da purtar. Tut quei tschentel jeu en tes mauns. Jeu roghel tei per tiu bien Spert, il Spert dalla clarezia che vul mussar a mi la via dalla veta. Perquei roghel jeu entras Jesus Cristus, nies frar e signur. Amen

1. Contemplaziun

Nuvs enconuschein nus tuts. In nuv ella curegia dils calzers, forsa en la launa da far caltschiel ni en la corda da ligiar il pac. Nus enconuschein era il renomau nuv el fazzalet da nas sco agid per la memoria.



Da nuvs plidein nus denton era a moda simbolica: cu enzatgei va buc aschia sco giavischau. Ei dat nuvs en la communicaziun denter carstgauns ni era cavistradas en relaziuns che selain sligiar mo grevamein. Per snuar tals nuvs drova ei

pazienza ed acceptanza
precauziun e sentiment
empatia e carezia.

Strer cun tutta furia vid il nuv porta nuot, mobein fa el mo aunc pli stagns. Ed ei drova la visiun per ina veta en dapli libertad.

Invit per contemplar la veta

Contemplei en tut ruaus la corda preparada per la devoziun. Co stat ella en relaziun cun mia momentana situaziun da veta ? Forsa vuleis Vus far in nuv en la corda, corrispudent a Vossa veta ? Forsa in grond ni plirs pigns ?

- Tgei ei en mia veta uliv, senza storschas e nuvs?
- Tgei nuvs, scumbegls, viriveris dat ei?
- Tgei damondas nunsligiadas occupeschan mei el mument?

cuort silenzi

Text biblic: Gion 8, 31-36

Jesus ha detg als Gedius che cartevan ad el: Sche vus resteis en miu plaid, essas vus veramein mes giuvnals. Vus vegnis ad enconuscher la verdad, e la verdad vegn a far libers vus. Els han rispundi ad el: Nus essan descendants d'Abraham ed essan aunc mai stai sclavs d'enzatgi; co sas ti dir: Vus vegnis ad esser libers? Jesus ha dau per risposta: Pilver, pilver, jeu ditgel a vus: Tgi che fa puccau, ei in sclav dil puccau. Ed il sclav resta buca per adina en casa; il fegl denton resta per adina. Sch'il Fegl dat la libertad a vus, lu essas vus veramein libers.

Supplica

Maria, ti che gidas nus a sligiar nos nuvs, ti muossas a nus tiu fegl Jesus Cristus. El vul era esser datier a mi en ils scumbegls da mia veta. Ensemen cun tei roghel jeu el: Ti has clamau mei alla libertad e ti has gia regalau a mi la libertad. Arva mes egls, per che jeu enconuschi la verdad da mia veta. Gida mei ad esser sincers enviers mei ed enviers tei. E gida mei, da viver en quella libertad, tier la quala ti has gia daditg deliberau mei. Perquei roghel jeu tei entras la forza dil Spert sogn. Amen

2. Contemplaziun

Nua che nuvs ein, leu cumprimescha enzatgei. En puncts centrals da traffic, en in cert senn nuvs da traffic, vegnan pliras vias ensemen per colligiar diversas direcziuns. En tals puncts sa enzatgei «vegl» flessegiai en enzatgei «niev» - ina veglia en ina nova direcziun, ina colur dil fil en in'autra, ina part dalla veta en ina che suonda.



Invit per contemplar la veta

Prendei puspei enta maun Vies «fil da veta».

Sche jeu vesel miu «fil da veta» avon mei – tgei puncts centrals fa el endamen a mi? Tgei muments nua che plirs fils da veta ein vegni colligai in cun l'auter entras in nuv: Parts da mia veta; staziuns nua che bia ei vegniu cumprimiu, concenträu; nua che jeu hai stuiu prender decisiuns; nua ch'ei ha dau midadas da direcziun; nua che jeu hai retschiert in special regal da veta?

Silenzii

Text biblic: Lucas 4, 16-21

Jesus ei era vegnius a Nazaret, nua ch'el era carschius si. E tenor sia isonza eis el ius il sabat ella sinagoga ed ei levaus en pei per leger avon. Ins ha purschiu ad el il cudisch dil profet Jesaja. Arvend il cudisch, ha el anflau il liug, nua ch'ei stat scret:

Il Spert dil Segner ei sur mei, pertgei el ha unschiu mei.
El ha tarmess mei per purtar la buna nova als paupers,
per annunziar liberaziun als perschuniers
e la vesida als tschocs,
per dar la libertad als squitschai.
ed annunziar in onn da grazia dil Segner.

Ussa ha el serrau il cudisch, ha turnau el al survient ed ei sesius. Ils egls da tut quels ella sinagoga fuvan drizzai sin el. Ed el ha entschiet a dir ad els: Oz ei secumplenius quei plaid dalla Scartira che vus veis udiu.

Supplica

Maria, ti che gidas nus a sligar nos nuvs, ti muossas a nus tiu fegl Jesus Cristus. El tarmetta a mi siu Spert schibein en muments aults sco era els bass da mia veta. Ensemens cun tei roghel jeu el:

Cu jeu mon sin vias puleinas – seigies ti cun mei.
Cu jeu piardel l'orientaziun – seigies ti cun mei.
Cu jeu anflel negina sortida – seigies ti cun mei.
Cu jeu sentinel con custeivla mia veta ei - seigies ti cun mei.
Cu jeu mirel en engrazievladad sin midadas en mia veta - seigies ti cun mei.
Cu jeu mon libramein mia via - seigies ti cun mei.
Lai enconuscher mei, che ti vuls era s'entupar cun mei e liberar mei – OZ !
Perquei engraziel jeu a ti cun Maria en la forza dil Spert sogn. Amen

3. Contemplaziun

Nuvs ein buca mo impediments. Els san era esser in bien agid, sch'els vegnan plazzai leu, nua ch'ei drova els. Nuvs san ligiar e dar sustegn. Ord biars nuvs el dretg plaz dat ei ina reit.



Invit per contemplar la veta

Prendeis puspei il « fil da Vossa veta » enta maun e contempliei el.

- En tgei loghens da mia veta dat ei «cruschadas» - ligioms tier auters carstgauns?
- Cun tgi sun jeu ligiaus/ligiada en ina buna moda, aschia ch'ei dat ina reit ?
- Nua sentel jeu sustegn entras auters carstgauns, ch'ein en ina ni l'autra moda s'uni cun mei ?

Text biblic: Jesaja 41,10

Buca tema, pertgei jeu sun cun tei,
buca fai quitaus, pertgei jeu sun tiu Diu.
Jeu dun forza a ti, gie, jeu gidel tei,
gie, jeu tegn tei cul maun da mia giustia.

Supplica

Maria, ti che gidas nus a sligiar nos nuvs, ti muossas a nus tiu fegl Jesus Cristus.
El nuva ensemes cun nus carstgauns reits da veta. Ensemes cun tei roghel jeu:

- Sliglia ils nuvs dalla direzia, dalla disfidonza e dalla tema denter nus carstgauns e lai viver mei en relaziuns rehas da fidonza e carezia.
Roga per nus, Maria
- Seiges tier ils carstgauns ch'ein malsauns e quels che sesentan persuls e lai luvrar mei cun fantasia vid la reit che dat tegn e segirtad.
Roga per nus, Maria
- Mira sin tutta discordia en nies mund e sin tut ils moviments, che promovan plitost la distanza che la vischinonza. Lai gidar mei da nuar vid la reit dalla pasch.
Roga per nus, Maria

- Accumpogna tia baselgia sin sia via el futur e regala a mi ed a nus tuts tiu Spert, che gida nus a nuar novs ligioms.

Roga per nus, Maria

Silensi per supplicas persunalas

Oraziun

Jeu roghel tei Maria per tia intercessiun en mes basegns e roghel:
Salidada seis ti Maria..

Segner Jesus Cristus, ti eis il spindrader dil mund, sin il qual tia mumma Maria muossa. Nus engraziein a ti, che ti eis maneivel da nus oz e tut ils dis da nossa veta. Amen

Canzun – Alleluja 491

1. Mi - gei - vla mum - ma mi - a, ti has in
 cor ca - rin e la ca - re - zia ti - a has
 ti dil Fegl di - vin. O mum - ma schi a - ma - bla,
 jeu hai fer - vent gia - visch: Da - mon - da per ca -
 re - zia tiu Je - sus, nos - sa glisch!

2. Tiu cor ei plein premura / per Diu e pils carstgauns; / survienta e signura, stend' o sur nus tes mauns! / O mumma admirabla, / jeu hai fervent giavisch: / Damonda per cardientscha / tiu Jesus, nossa glisch!

3. La fin da mia veta / Dieus fa il truament; / tut ha en el valleta, / sch' jeu spetgel siu advent. / O mumma tut beada, / jeu hai fervent giavisch: / Damonda per speronza / tiu Jesus, nossa glisch!

Babnos

qual che ti eis en tschiel...

Benedicziun

Diu misericordeivel

Enzuglia cun tia benedicziun tut nos embrugls dalla veta.

Tschenta tia benedicziun sin tut las vias entratschadas da mia veta.

Rinforza cun tia benedicziun miu cor che sa enqualga buca decider.

Lai flessegiar tia benedicziun en tuts endiraments e scumbegls da nossa tiara.

Per tia benedicziun rughein nus tei, misericordievel Bab, Fegl e Spert sogn. Amen

Maletg sill a cuviarta:

Johann Georg Melchior Schmidtner, entuorn 1700, St. Peter am Perlach (Augsburg)

Pleivs Glion, Sagogn, Sevgein, Schluein. Matg 2020.